

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácaandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ²Te cánuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha ródhó, te sáha ya jeē coo ndeyí coo siī ni rō jijnáhan ró.

Jeē sándaā yā cuēchi quivī ndíji Cristo

³Cánuú jéē niní nacuatáhú rí nuū Yaā Dios jeē siquí rohó jijnáhan ró hermano. Chi súcuan íyó váha, chi yōhyo váha cuahije ró jíin jnúhun jeē cácaandíje ró yá, te yōhyo cuanducuehē jeē cácaandíje ni rō táca jnáhan ró. ⁴Te jeē yúcuan cúu jeē cácusí teyí ni rī cánacani ri jnúhun ró núu táca grupo ñayuu cácaandíje nuū Yaā Dios. Chi váha cácaandíje ró, te váha cájendeyí ni rō jeē cájito xeē ñayuu rohó jíin jéē cándoho ró táca gá jnúndhó. ⁵Te jíin táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi siquí ñuu un cúu jeē cándoho ró. Te jeē súcuan chíhi ya cuenta

siquí rō, yáha stéén nuū yō jeē váha Yaā cúu ya.

⁶Te suni íyó váha jeē nastóho ya ñayuu castóho ródhó. ⁷Te quivī ndíji Jítóho yō Jesús, quivī un sáha Yaā Dios jeē ndétātu ródhó jéē cándoho, te suni ruhū jijnáhan ri. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder.

⁸Te cuáha ya castigo nuū ñáyuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i. ⁹Te ñayuu ún chi ndoho i níf cáni, chi cujiyo i nuū maá Jítóho yō, te ma cúu quívicoo i nuū lúu ndasí cújéhnú ya jíin poder yā. ¹⁰Súcuan sáha ya quivī ndíji ya jeē lúu cújéhnú ya sáha ñayuu cácaandíje jeē yíhi ndaha ya. Te nahán naa ni i coto i nuū yā. Te suni súcuan ródhó jijnáhan ró, chi ni cacandíje ró jnúhun jeē ní canacani ri nuū rō.

¹¹Te jeē yúcuan cúu jeē niní cájicān tahú rī jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquí jeē cácaandíje ró. ¹²Te súcuan te

cujéhnú máá Jítóho yō Jesucristo sáha ró, te suni cujéhnú máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

**Jnūhun siquī maá téé
sáha xeēn cuēchi**

2 Vijna te cahān rī siquī jeē ndíji máá Jítóho yō Jesucristo jíin jéē ndutútú yó núū yā. Cácahān ndahú rí jíin ró jijnáhan ró hermano, ²jeē ma cuáha ró jnūhun sacā nuu caní ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuiti rō vēsú núu cahān i jeē ni níhīn i ñin jnūhun siquī un núū Espíritu, chí ñin jnūhun jeē ni cáhān ñnga, chí núu cachi i jeē ruhú jijnáhan ri ni tají ñin carta jeē cahān súcuan. ³Ma cuáha cuiti rō jnūhun jeē stahú ni ñin i róhó. Chi nde ná tu quiji quivī ún te xihna gā ndunihni ni cuehē ñayuu nuū yā, te quenda ndíjin máá téé sáha xeēn cuēchi, te tēe jnāhnū ndetū cúu máá téé ún. ⁴Chi tēe jíto uhū Yaā Dios cúu de, te ndonda de contra siquī táca jéē casnání i yaā i jíin táca jeē cáchiñúhún i. Te xeēn gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵¿A cánahán ró jnūhun yáha? Chi súcuan ni cahān rī jíin ró ná ni iyo ri jíin ró. ⁶Te je cájini rō ndé vé cúu jeē jési jeē ná tu quenda ndíjin tēe ún, chi nde na quee quivī maá de. ⁷Chi je jícu sāhi táca cuēchi xeēn ini ñayiví, te vijna chí iyó jéē jési nuū, návāha ma

cáa ndasí gá cuēchi, chi nde na cújiyo máá jéē jési nuū. ⁸Te sáá te quenda ndíjin maá téé xeēn ún. Te máá Jítóho yō Jesús cahni ya tēe un jíin táchi yuhu-ni ya, te jíin jéē ndíndēe yá ndíji ya te snáhnú ndetū yā de. ⁹Te jeē quíji tēe xeēn ún chí máá Satanás sáha. Te quiji de jíin cuéhē poder, te sáha de táca jniñu jéhnú jeē stahú de, jeē nahán naa ni ñayuu coto i. ¹⁰Te jíin táca jniñu néé te stáhú ndasí de ñayuu jeē jnahnú ndetū, chí tu ní cúní i cuatáhú i jnūhun ndaā jeē cácu i núú. ¹¹Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. ¹²Te súcuan te jecondee cuēchi siquī ndíhi i jeē tu ní cácañíje i jnūhun ndaā, chí sa jniñu néé ni cacusiñi ni i jíin.

Ñayuu jeē ní nacāji ya jeē cācu i

¹³Te cánuú jéē niní nacuatáhú rí jijnáhan ri nuū Yaā Dios jeē siquí rohó jéē cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéē jnáma ya rohó. Chi sáha Espíritu yā jeē cáhiyo ndoo cáhiyo ñi rō nuū yā te cácañíje ró jnūhun ndaā. ¹⁴Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quivicoo ró núu cujéhnú luu ró jíin máá Jítóho yō Jesucristo.

¹⁵Núu súcuan te cuiñi ñihin ró hermano, te conahán váha ró jnūhun jeē ní cacutūhva ró núu rí, núu jeē ní cacahān rí chí jéē ní tee ri nuū carta. ¹⁶Máá Jítóho yō Jesucristo jíin Tátá yō Yaā Dios ni cundáhú ni yā yohó, te ní sáha ya jeē coo siñi ni yō níí cáni,

jíin jéē nūhun ni yō tāca jéē váha jeē coo siquī jeē váha ni yā jíin yó. ¹⁷Te na sáha ga yā jeē cóo ndeyí ni anuá rō jijnáhan ró, te na sáha ya jeē íje rō cáhān rō tāca jnūhun váha ya, te sáha ró táca jniñu váha.

Jeē na cacán tahu i jehē de

3 Te íyó inga jnūhun cánuú, hermano. Na cacán tahu rō jehē rī jijnáhan ri, návāha yachī cuitē núu jnūhun máá Jítóho yō, te cuatáhú váha ñayuu, nájnūhun ni cajetáhú máá ró. ²Te suni cacān tahu rō jeē na cácu ri nuū tāca tée casáha nées jéē cátejnahān jíin rí. Chi tú ndíhi tēe cácandíje jnūhun ya. ³Te máá Jítóho yō chi váha squícu ya jeē ní jéjnūhun ya, te sáha ya jeē íje ni tāca ró jíin jnūhun ya, te coto ya rohó núu jeneé. ⁴Te cácucahnu ni rī sáha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin. ⁵Te ñúhun ni rī jeē máá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jéē cuándeyí ni rō nájnūhun ni sáha Cristo.

Jeē cánuú sájniñu yó

⁶Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo rō núu táca hermano cájica cúxí te tu cájica váha de nájnūhun ni castéén rī nuū rō. ⁷Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahíyo ri jíin ró. ⁸Ni tu ní cáyeji rī staā ni ñin ró súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān ri ni ñin ró. ⁹Te vēsú íyó

derecho rī jeē cacán rī nuū rō nuú, te tu ní cájicān rī, chi súcuan ni casáha ri návāha cuu ri ñin ejemplo nuū rō ndese sáha ró jijnáhan ró.

¹⁰Chi ná ni coyūcu rí jíin ró, te ni candacu ri jniñu yáha nuū rō: Núu ndé ñin ñayuu tu cúní i sájniñu i, te suni ma cáji i núu súcuan. ¹¹Chi ni canihīn rī jnūhun jeē cájica cúxí sava ró, te tu casájniñu ró, chi yāha yúcuan-ni sáha ró. ¹²Te cándacu ri jniñu nuū rohó jéē casáha súcuan, te cástíhví ni rī rohó jeē na cóo nayúu ró te sájniñu ró, návāha nihīn rō jeē cáji rō siquī jniñu sáha máá ró. Chi súcuan ndacu máá Jítóho yō Jesucristo jniñu.

¹³Hermano, ma ndínuu ni rō jijnáhan ró sáha ró táca jniñu váha. ¹⁴Te núu ndé ñin i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quiijnáhan ga rō jíin i, návāha na cúcanu i te nacani ni i. ¹⁵Te nasūu jéē cóto uhū rō i, chi sa cahān rō jíin i nájnūhun jíin ñani rō jeē na sájniñu váha i.

Bendición jeē sándihí

¹⁶Te ñúhun ni rī jeē máá Jítóho yō, Yaā jeē jéhe jnūhun ndeyí sīñ ni, níní na sáha ya jeē coo ndeyí coo sīñ ni rō siquī táca-ni, te coo ya jíin ró jijnáhan ró.

¹⁷Ruhū Pablo, yāhá-ni cúu jeē tée ri jíin ndaha máá rí jeē cahán rī jeē sándeyí ni rō jijnáhan ró. Te súcuan jéhe ri firma nuū tāca carta rī, návāha cuni rō jeē carta máá rí cúu. Súcuan cáa letra rī. ¹⁸Te ñúhun ni rī jeē máá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.